

Gabú Hpo Lù Dang



Yesuq é Hkyô Mhō-myi Shindâm

Laiká bùk - 5

Laiká Bùk Shî-Má Bo É Dang-U Pé

1. Mariq lé Garai byî é dang gidìq (Lukaq 1: 26-38) 1
2. Yesuq lé hkû bê! (Lukaq 2: 1-20) 2
3. Yesuq, Yohan lòq má wuì-myhup hkâm yu é hkyô
Lukaq 3: 21- 22 6
4. Yesuq lé, Tsádán gúnglaú é hkyô (Lukaq 4:1-13) 7
5. Yesuq é sâng-hi lhê é chángzo wuî (Lukaq5:1-11) 9
6. Bánno Buinyì Má Gùng Lòq HtenSû Lé, Lhoq Gê Byî
É Hkyô (Lukaq 13:10-17) 11
7. Lhoqlhai Poî Lé Món É Hkyô
Mht 26:17-30; Mrk 14:12-26; Yhn 13:21-30 13
8. Yesuq Lé Mara Hun É Hkyô
Mht 27:1-2, 11-14; Mrk 15:1-5; Yhn 18:28-38 15
9. Yesuq Lé Sat Râ Matú Doqdân É Hkyô
Mht 27:15-26; Mrk 15:6-15; Yhn 18:39-19:16 17
10. Yesuq Lé Tapzîng HtoqMá Jén Tap É Hkyô
Mht 27:31-44; Mrk 15:21-32; Yhn 19:17-27 19
11. Yesuq É Màng Lé LupHkaû Má Kat É Hkyô
Mht 27:57-61; Mrk 15:42-47; Yhn 19:38-42 22
12. Yesuq Dum Dui Toq Bê
Lukaq 24:1-12, 36-53 23

Mariq Lé Garai Byî É Dang Gidìq



A-nham lé, Garai Gasang gi, maumang Gabriélaq lé Galilé mau, Nazaret gâ é wà shut, nhang kat ri. Maumang haû gi, Mariq gâ é myiwe zo rayùq é matú danglù wun lé byî ri. Mariq gi, hkóhkâm Dawiq é awùt ashín nghut é Yosep gâ é yùqqè rayùq eq hâng lhum râ matú, dang gidìq byî lhûm to bê sù nghut ri. Maumang gi, Mariq chyáng jé lé mù, “Nguì ngón nyì sháng gàq! Yhûmsîng Garai gi, nàng eq rahá nghut luî, nang lé aróng mó byi bê nghut ri.” ga, taî kyô ri.

Mariq gi, maumang haû é lù dâng é yánmai, gyai gyô sing nán byùq é eq, yhâng dang pé gi, haî nghû nau é wá nghut berâ làq ga, maú nyî bê nghut ri. Maumang gi, yhang lé, “Mariq ê! Hkâgyùq; Nang lé Garai Gasang byî é aróng mó nghut lhê. Nàng gi, gùng laî lò mù, yùqzo rayùq wó râ nghut luî, yhang lé, “Yesuq” nghû myìng myhíng byi ra kôra nghut lhê.” gâ ri.

“Yhang gi, byù mó rayùq dùt râ nghut mù, Myhang dik htûm é Garaî é yùqzo ga sê bum bekô râ nghut lhê. Yhûmsîng Garai gi, yhang lé, yhâng îchyí îwa Dawiq dùt laî lò bê sù, hkóhkâm rayùq dùt nhâng râ nghut lhê. Yhang gi, Isira-élaq byù pê é ahtoq má, hkâ-nhám le hkóhkâm dùt nyî râ sù nghut lhê. Yhâng é hkóhkâm mîngdán gi, dât htum râ a nghut.” gâ ri.

Mariq gi, maumang haú lé, “Nghut kôlhang ngò gi, zo-myi jèt rayùq nghut lhê. Hkâsu kut wó dùt lò râ lhú?” ga, taî kat ri. Maumang dum tû taî é gi, “Chyoiyúng Woinyí gi, náng chyáng jé lé mù, Garaî é atsam gi, nàng eq rahá nyî râ nghut lhê. Hau é yánmai, chyoiyúng zoshâng gi, Garaî é Yùqzo ga kôrâ nghut lhê. Náng é amyû suisho nghut é, Élizabet lé myît kat wú aq. Byù pé gi, yhang lé, gyai mâng byùq bê yánmai, zoshâng a ge bau lo ga taî bum akô nghut ri. Nghut kôlhang yhang gi, gùng laî é lháng, lha-mó hkyuq hkyàp wàng bê nghut ri. Haî mù gâ lé, Garai Gasang gi, yhang dùt nhâng nau é haî lé le, wó kut é sù nghut lhê.” gâ ri. Mariq gi, “Ngò gi, Yhûmsîng Garaî é duínhâng zoshâng nghut lhê. Nàng taî é eq rajung za, shí pé bànshoq gi, ngá chyáng dùt lò lo sháng gàq o!”ga, tû taî kat bê nghut ri.

Yesuq lé hkû bê!



Hkâ-myháng a myáng má, Romáq Hkoséng Augustuq mai, hkunmó ralhum hkyô kat mù, byù yùqdu jùp gi, ó le ô é yhum mau shut ló luî, asuyaq jihpân pé má, yhûmsing é myìng kat lhóm râ ri. Haû mù, Yosep gi, Galilé mau, Nazaret wà zo mai Yudaq mau mâ é Belehem wà shut, dòq ló bê nghut lhê. Haû gi, hí hkûn lhê é Hkóhkâm Dawiq é choq hpyit jowò nghut ri. Yosep gi, Dawiq é awùt ashín rayùq nghut é yánmai, haú wâ má, ê râ dùt ri. Yosep gi, yhang dúng tô é Mariq eq rahá za, haú wâ shut dòq ló akô nghut ri. Mariq kúm gi, gùnglòq laî lò bê sù nghut luî, Yosep eq yhángnhik Bethlehem wà má nyi tô ashî lé, zo bau râ bui-nyí jé bê nghut ri. Yhángnhik bíng râ matú, bíng-yhûm pé má bíng wàp a jòq dùt byùq bê nghut ri. Haû mù, yhángnhik gi, no, myang pé lé zang byi tsô é zúm ralhum má, ê bíng bekô nghut ri.

Haú má, Mariq gi, yhang é zomún nghû râ yùqzo ra yùq lé hku kat bê nghut ri. Yhang gi, zoshâng lé pánchoq èq baí yùp luí, no-mhan lànghkâng má lheq tô ri. Haú myîn lé, sau zúng bang ra-am gi, sau rém jáng pé má, yhángmòq é yàng pé lé zúng nyi bum akô. Yhûmsîng Garaî chyáng mâ é maumang rayùq gi, yhángmòq lé lé htoq shit luí, Yhûmsîng Garaî chyáng mâ é dùq wùp ralhum gi, yhángmòq é ahtoq má dùqbó to bê nghut ri.

Yhángmòq gi, gyai chôm gyùq dan byùq akô nghut kôlhang, mau-máng haû gi, yhángmòq lé, “Hkâ gyùq nyi kó! Ngò gi, byù lhúnglhâng bang lé, gyai ngón nhâng râ gabú hpo lùdang wun lé lo lhê. Hkû-nyí, núngmòq é Hkyi yù Yhûmsîng gi, Bélehem wà má hku to bê nghut ri. Yhang gi, Yhûmsîng Garai Hkrísdùq nghut lhê! Núngmòq gi, yhang lé, pánchoq èq baí yúp luí, lànghkang ralhum má, lèq tô é lé, myang hô kôra râ nghut lhê. Haú gi, ngò taí é hkyô têng é lé, núngmòq wú sé râ nghut lhê.” ga taí kyô ri. Haû jáng yhang, maumang ra jùm rayò htoq shit lò mù, Garai lé hkya-ôn kô é dang pé gi, “Mauhkûng htoq tsáng myhâng má nyi é Garai lé, byù yùq jùp gi, hkya-ôn nyi keq ô! Yhang gi, yhang ô nau é dông châng é myìdàm htoq mâ é byu pé lé, byi râ ga, dang gadiq tô tô é eq rajung za, nguì-ngón hkyô gi, hkyó byi sháng gàq” gâ akô.

Maúmâng pé mauhkûng shut ló byùq é htâng má, yàng zúng bang rayùq rayùq taí lhum kô é gi, “Yhûmsîng Garai gi, Bélehem wà má dùt laí lò bê hkyô pé ngá-nhúng lé taí kyo bê nghut lhê. Ngá-nhúng ê jé wú lô sháng!” gâ akô. Haû mù, yhángmòq gi, hân hân ê kó luí, Mariq eq Yosep nhik lé, ê myâng kó mù, lànghkang hkaû má lèq tô é nyheqnú lé le, ê myâng bekô nghut ri.

Zoshâng zo haú lé myàng kô jáng, zoshâng haû eq séng luí, maumâng pé mai, yhángmòq lé taí shit kô é hkyô pé, Mariq eq Yosep nhik lé, taí kyô akô nghut ri. Yhángmòq gi, gótû byù pé lé lé, taí kyo bekô nghut luí, dang haú pé lé wó gyô é bang yùqdu jùp gi, gyai yhang maú byùq bekô nghut ri.

Mariq kúm gi, dùt laí lò bê hkyô bànshoq lé, dum bûn nghâm kat luí, haú pé lé, ûnghkaû má, myít wú nyi ri. Sau zúng bang gi, yhángmòq wó myang yù, wó gyô yù bê hkyô pê é yánmai, Garai lé hkya-on uchyang, sau zúng jang shut dum taû ló bekô nghut ri. Lhúngl háng gi, haû maumang yhángmòq lé taí shit kyô é eq rajung za chyat dùt bê nghut ri.


Yesuq, Yohan Lòq Má Wuì-Myhup Hkâm Yu É

Hkyô



Yesuq gi, asàk sum xê zàn kô nghut é hkûn, Yohan eq byù myo myo lé, wuì-myhup hkám byî nyi é jowò, Yodan làng shut e ri. Byù pé lhúnglông bang, wuì-myhup ban hkâm yù kô é htông má, Yesuq le Yohan chyáng wuì-myhup hkâm yù bê nghut ri. Yesuq gi, wuì-myhup hkâm yu é eq, kyûdung bê nghut ri. Yhang kyûdung nyi le, mauhkông bóng lô lúi, Garaî é Woí-nyí gi, hpôngkyui gùnghkyâng đông jé gyó lò mù, yhang é ahtoq má, lé zung to bê nghut ri. Hau htông, Garai gi, mauhkông mai, “Nàng gi, Ngò gyai chyitdàp é Ngá yùqzo nghut lhê. Ngò gi, náng é ahtoq má, gyai gabú myit ngón lhê ô!”ga, yhang lé tât kat ri.

Yesuq Lé, Tsádán Gúnglaú É Hkyô



Yesuq gi, wuì-myhup hkâm yu é htâng, Garaî é Woí-nyí èq ùphkang é a-ô má, Yodan lànq mai, wê é shut lám htoq ló bê nghut ri. Woí-nyí haû gi, yhang lé, byù ó lé a nyi é jowò ralhum shut shuî e ló luî, haú má buì-nyì myixê nyí jé shoq nyi byùq nhang ri. Yesuq haú má nyi tô hkûn, Tsádán jé lé luî, yhang rajung jung kut shut shoq ga gúnglaú ri.


Haú bun haú yòq má, Yesuq gi, haî le a zô é yánmai, gyai zòmùt nyì bê nghut ri. Tsádán gi, Yesuq chyáng jé lé lò luî, “Nàng Garaî é yhangzo nghut le gi, lùqqòk hkyí shí pé lé mùk htung kut mù zo aq” ga taî ri. Nghut kôlhang, Yesuq dum tâ taî é gi, “Byù rayùq asàk wó duî râ matú gi, mùk èq za asàk wó duì râ a nghut.”ga Chyúmdang taî kyô tô ri. Hau htâng, Tsádán gi, Yesuq lé, gyaí myhang é jowò ralhum shut shuî dòq ló luî, mingkan htoq mâ é mîngdán pé lhúnglhang lé, razùp má za yhang lé, tân shit ri.

Haû mù, tsádán gi, “Nàng hkyî hput htuq luî, ngo lé noqkuq é nghut jáng, mîngdán shí pé bànshoq eq yhángmòq é sùtzè pé ahtoq má, nang lé ùp hkâng nhâng râ nghut lhê. Ahkuî, shí pé lé, ngò ùp hkang tô é yánmai, ngò hkyin yù sù ó yùq lé nghut kôlhâng, zè shí pé lé ùphkâng râ ahkâng lé ngò wó byî lhê. Nàng hkyî hput htuq luî, ngò lé noqkuq kat àq. Haû jáng, shí ahkâng ayá bànshoq gi, náng é dùt râ nghut lhê.” ga taî kat ri.

Yesuq dum tô taî é gi, “Náng é Garai haû Yhûmsîng lé za, nàng wó noqkuq râ nghut luî, gó yùq lé a wó noqkuq, yhang lé za, nàng wó hkúnga râ nghut lhê.” ga Chyúmdang pé má taî kyô tô ri. Hau htâng, Tsádán gi, Yesuq lé, Yerusalem wà mó shut, dum shuî e ló luî tarâjong mâ é myhang dik é jowò má yàp nhang tô ri. Haû mù, yhang gi, Yesuq lé, “Nàng Garaî é Yhangzo nghut é nghut lé gi, náng gûng lé dú hkyô kat wú aq. Haî mù gâ lé, Chyúmdang pé má, “Nang lé, rago wú zúng byi râ matú, Garai gi, yhâng é maumâng pé lé, hkun mó hkyô to râ nghut lhê ga taî ri.

Hau htoq agó, Chyúmdang pé má, Nàng byît gyó é hkûn, a-ô mâ é lùqgòk pé hká, náng gùng a záng htûng pyám shoq, maumâng pé mai lhom bún yû kô râ nghut lhê.” ga luî, le bo tô ri.” gâ ri. Yesuq gi, “Nàng gi, haû Yhûmsîng náng é Garai lé, nàng ô nau é dông kut nhâng râ matú, hkâ-nhám lé wó chyam wú râ a nghut.” ga luî Chyúmdang pé má taî tô lhê.” ga tô taî ri. Tsádán wá gi, gótû hkyô myo myo èq Yesuq kut shut sháng gàq ga, shi-kùt wú kôlhâng, a wó ung kat nghut ri. Haû mù, yhang gi, Yesuq chyáng mai rayòq zo byam gâng ló bê nghut ri.

Yesuq é sâng-hi lhê é chángzo wuî



Ra-nyí lé, Yesuq gi, Galilé nhông gin-gau htoq má, yàp tô ri. Haú hkûn, byù myo myo gi, yhang hko kyô é Garaî mungdang lé, gyô yù kôra ga luî, yhang chyáng chyîn chyap wang e ló bum akô. Haû mù, Yesuq gi, haú má jòq tô é Simun é lhaî hkaû shut wang e ló bê nghut ri. Yhang gi, Simun lé, lhaî haú lé wuî yàm mai ra-tsuí zo huî kat nhâng luî, haú má zung to uchyang byù hpûng lé mhoqshit byi bê nghut ri. Yesuq gi, ban mhoqshit jáng Simun lé, “Nàng eq náng é luzúm wuî ngozo wó kông yù râ matú, núngmòq é gùn lé wuî je nìk é shut huî ê mù, gùn lé dú kat keq” ga tâi ri.

Haú hkûn, Simun gi, “Yhûmsîng ê! Ngá-mòq a-màn ramyin mau yhang, kông shi-kùt wú bê, nghut kôlhang, radu lháng a wó nghut ri. Hâi wá nghut kôlhang, nàng haú đông táí jáng gi, gùn lé ngá-mòq dum dú hkyô kat wú râ nghut lhê.” ga tâ taí kat ri. Haú mù, yhángmòq gi, gùn dum dú hkyô kat wú akô. Gùn haú gi, lháng jèq ló râ su dùt shoq ngozo wó chyup yû bekô nghut ri. Yhángmòq gi, yhángmòq é luzúm wuî lé, lé garúm yù râ matú wùt akô.

Haú mù, yhángmòq é luzúm wuî gi, gótû lhaí mai jé lé lò kôluî, yhángmòq é lhaí í lhum gi, ngozo lhûm byíng byùq é yánmai, myùp ló râ su dùt ló byùq bê nghut ri. Simun Pétruq gi, dùt laí lo é hkyô lé myàng jáng, Yesuq é hí má, hkyîhput htuaq luî, yhang lé, “Yhûmsîng ê! Ngò gi, yubàk gyai wó sù rayùq nghut lhê.

Ngò lé baú za tô to laq.” ga tâ ri. Yhang îsu ga tâi é lé, yhang eq yhâng é luzúm wuî lhúnglhang bang gi, wó chyup yù bê ngozo rabùm razàng é yánmai, gyai maú hong byùq kôluî, tâi é nghut ri. Yesuq gi, Simun lé, “Hkâ gyùq nyì, nàng gi, ahkuî mai, byù lé châng kóng mù, ngá chángzô pé dùt nhâng râ sù nghut é kúmlhá nghut lhê.” ga tâ ri. Hau htâng, Simun eq yhâng é luzúm wuî gi, yhángmòq é lhaí pé lé, wuî yàm má dum kôn tap to kô mù, yhángmòq é ngozo kóng zô é mú zó lé tô pyâm to kô luî, Yesuq é htâng má cháng bekô nghut ri.

Noqkuq É Buìnyí Má, Myiwe Myhí Rayùq Lé Yesuq Lhoq Gê Byî É Hkyô



Yudaq byu pê é noqkuq buì-nyí lé, Yesuq gi, yhángmòq noqkuq kuq é yhûm ralhum má, mhoqshit byî nyi ri. Nàt gang wang júng é myiwe myhí rayùq le, haú má bolom tô ri. Nàt haû gi, yhang lé dàng goí byùq nhang é yánmai, yhang gi, nyàng nyàng kut a wó yàp lo dùt byùq bê nghut ri. Yhang haú su dùt byùq é raxe shit zân myáng bê nghut ri. Yesuq gi, yhang lé byu myang kat mù, htê mó èq, “Ahkuî, nàng gi, wángzán bê nghut ri.” ga luî, yhang é ahtoq má lòq ke byî ri. Haû mù, yhang gi, radàm taq nyàng za kut toq yàp kat luî, Garai lé hkyá-on bê nghut ri. Haû noqkuq yhûm mâ é sùwún hpó gi, noqkuq é buì-nyí má, myiwe myhí haú yùq lé, Yesuq èq lhoq gê byî é yánmai, wú nhik-yô to bê nghut ri.

Haû mù luî, haú yùq gi, “Ngá-nhúng ge é mú zó kut râ bui-nyí pé bàt hkangmó má hkyuq nyí bo tô lhê nghut é yánmai, haú bui-nyí pé mâ é ra-nyí má, lé lhoq ge yù keq. Nghut kôlhang, noqkuq é bui-nyí má gi, lhoq ge yù râ matú shí shut hkâ lé kó!” gâ byù hpûng lé taî kat ri. Haû jáng, Yesuq gi, “Núngmòq byu pé gi, Garaî é htâng châng mhaú bang za nghut nyi bum akô.

Dangtú núngmòq é No a nghut jáng, Myang wuîshit tô é nghut le, noqkuq bui-nyí má nghut to kôlhang, núngmòq uchyam byi huq râ matú, hkup mai hpông htoq nhâng râ nghut lhê. Myiwe myhí shî gi, ngá-nhûng é byù hú mâ é rayùq nghut to kôlhang, Tsádán gi, yhang lé raxe shit zân yhang myáng shoq yhâng é htóng byû dùt nhang pyám bê nghut ri. Noqkuq bui-nyí má nghut to kôlhang, yhang gi, lhoq lhut byi gíng sù za nghut lhê.” ga tô taî kat ri.

Haû su ga jáng, haú mâ é Yesuq lé, a ô nau é byù pé gi, Yesuq taî é dang yánmai, hoq hpû byùq bum akô. Nghut kôlhang, gó bang bànshoq kúm gi, yhang kut shit é maúhpo pé bànshoq é yánmai, gyai yhang gabú nyi bum akô.

Yhâng Chángzô Pé Eq Myínzang Chôm Zô É Hkyô



Sau zo radu lé sat luí, lhoqlhai poí kut é yòq nghut bê. Yesuq gi, yhâng é chángzo í yùq, Pétruq eq Yohan nhik lé ji kat mù, yhangnhik lé, “Ê luí, ngá-nhông é matú zoshuq ê món to lánq keq.” ga luí, nhang kat ri. Haú hkûn Yesuq gi, “Núngnhik Yerusalem wà mó má, wà hkaû shut wang e ló le, wuì yambú ralhum wàq é byù rayùq eq, hui râ nghut lhê. Yhang wang lé é yhûm ahkaû shut yhang eq rahá châng wang ló luí, haú yhûm é yhûmsîng hpó lé, “Haú sará gi, lhoqlhaî poí zoshuq lé ngá-mòq hkâ-má wó zo râ lé sé nau ri.”nghû myi keq. Haú hkûn, yhûmsîng hpó gi, ngá-nhúng ra châ é hkyô hkangmó jòq tô é, ahtoq tsáng mâ é gòk mó ralhum núngnhik lé lhom tân shit râ nghut lhê. Haú má, zoshuq món to keq.” ga tâ ri. Petruq eq Yohan nhik gi, wà mó hkaû shut jé wang ló le, yhángnhik lé, Yesuq tâi kat é eq rajung za chyat, hkyô hkângmó lé wó myang bekô nghut ri.

Haû mù, yhángnhik gi, zoshuq lé món wang ló bekô nghut ri. Myínhtâng jé jáng, Yesuq eq yhâng é chángzô pé gi, yhúm hkaû shut wàng bekô nghut ri. Yhángmòq chôm zo shuq nyi tô é hkûn, Yesuq yhángmòq lé taî é gi', "Ngò gi, hkâm-yháng a myáng má, jamjau hpu zo berâ nghut é yánmai, núngmòq eq rahá za zoshuq shí lé gyai chôm gàm zo nau nyi é nghut lhê. Garai hkóhkâm dông ùp é bui-nyí a jé jé gi, lhoqlhai poî zoshuq gótû ralhum lé ngò dum zo râ a nghut.

Haú ahkyíng má shèq zoshuq poî shi é lichyúm gè gè gi, haî nghut é lé, núngmòq sé bekô râ nghut lhê." gâ ri. Hau htâng Yesuq gi, tsibiyiq wìng ra góm lé yù mù, Garai lé jeju hkya-on luî, góm haú lé chángzô pé lé gàm byî ri. Haû mù, yhángmòq lé, "Shí góm lé yù luî, tsibiyiq wìng lé, núngmòq gàm shuq keq. Núngmòq hkyak za sê to râ dùt é gi, Garai hkóhkâm dông ùp é bui-nyí a jé jé tsibiyiq wìng shî lé ngò, dum shuq râ a nghut." ga taî ri.

Hau htâng, yhang gi, haû mùk lé le yù mù, Garai lé jeju hkya-on luî, yhâng é chángzô pé lé myhik hpé luî gàm byî ri. Haû mù, yhángmòq lé, "mùk shî gi, ngò, núngmòq é matú byî pyám é ngá é gùngsho malaî nghut lhê. Ngò lé bûn nyi râ matú shî lé zo keq." ga taî ri. Myínzang bàn zô é htâng má, yhang gi, haû góm lé le dum yu chung to luî, "Góm shî gi, núngmòq é matú, ngò shî hkam byî é hkyô má byu pé eq xuq tô é dang shikaq sik é malaî nghut lhê." ga taî kyô ri.

Yesuq, Tarâ Jéyang Huî É Hkyô




Yesuq gi, haû lhoqlhai poî zoshuq ban é myîn, Gethsemani hkyam má nghut tô é hkûn, chyup yu pâm é hui luî, Yudaq htûng sêwún wuî eq myî jep é lé huî ri. Htâng nàp jé jáng, yhángmòq gi, yhang lé, Romaq mingzau Pilat chyáng shuî jé kômû, Yesuq kut lai lo é hkyô pé lé a gè a shop é dông mingzau Pilat lé taî kyô bùm bekô nghut ri. Yhángmòq taî é gi, “Ngá-mòq gi, byù shí yùq lé asuyaq eq shai é dông ngá-nhûng é byù pé lé gumlau shuî toq râ hen nyì mù, chyup yu pyâm é nghut lhê. Yhang gi, yhángmòq lé hkoséng wá chyáng kang kat byi nó a ra ga taî nyì sê nghut ri. Hau htoq agó, yhang gi, ngá-nhûng é hkóhkâm Garaî èq hkyin tô é sê ga, yhâng gùng yhang taî nyì sê nghut ri.” gâ bum akô. Haû mù, mingzau Pilat gi, Yesuq lé, “Nàng gi, Yudaq byu pê é hkóhkâm nghut lhê lhú? ” ga myî kat ri. Yesuq gi, “Yesuq gi, “Nàng taî é eq rajung za nghut lhê.” ga tû taî ri.

Haú hkûn, Pilat gi, “Shí yùq lé hûn râ mara ngò a myàng.” ga luî, hkyangjong agyi pé eq shiwa byu pé lé taí ri. Nghut kôlhang, yhángmòq gi, “Shí yùq gi, Yuda mau gón má yhang mhoqshit é dông mai, mingbyû wui é i-myt lé shuî gabyông ri. Haû gi, Galile mau mai ahkuî shî má jé shoq nghut bê nghut ri.” ga zùq zùq taí bumakô. Pilat gi, haû su ga kô é lé wó gyo jáng, Yesuq Galile byù nghut a nghut é hkyô lé myî wú ri. Yesuq gi, Herut up é mau mâ é byù nghut é lé Pilat sé jáng, haú u lé Yerusalem wà mó má nyi tô é Herut chyáng, ê dé kat nhang ri.

Herut gi, Yesuq lé myàng jáng, gyai gabú ri; hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhum lhum kut shit é lé, wó myâng berâ ga, myit myoqbyu nyi é nghut luî, Yhang lé myàng nau é gyai yhang myáng bê nghut ri. Haû mù, yhang gi, Yesuq lé dangmyi myo myô èq myî wú kôlhang, Yesuq gi, dang rahkun lháng a tâ taí byi nghut ri. Herut eq yhâng é gyèzô pé gi, Yesuq lé rhoî jihkyoî kut mù, atam é dông taí hpoi kô luî, réng é mèbu hut byi mù, Pilat chyáng dum tâu dé nhang kat akô.

Yesuq Lé Sat Râ Matú Doqdân É Hkyô




Pilat mingzau gi, Yudaq htông sêwún wuê eq gótú byù pé lé, rahá za ji tsîng to luî, “Núngmòq gi, shí yùq lé asuyaq eq shai é dông núngmòq é byu pé lé shuî gumlau nyì sê nghut ri ga, ngá chyáng shuî lé kô é nghut lhê. Nghut kôlhang, ngò núngmòq é hí má, yhang lé myî jép wú bê nghut lhê, núngmòq taî pùt é hkyô pé gi, ralhum lháng a têng é lé myang bê. Hkóhkâm Hérut le, yhang mara a bò sê nghut é lé myàng bê yánmai, ngá-nûng chyáng dum dé kat é nghut ri. Shí yùq gi, shut é hkyô a kut é yánmai, shî râ a gíng; haû mù ngò gi, yhang lé wasê èq nhuq é htâng, nhang kat pyám berâ nghut lhê.” gâ ri. Haû gi, lhoqlhai poî nám nghut mù, Yudaq byu pé lé imyit lhoq ngón nhang é dông, Romaq mingzau mai hkâ-nhám le htóng byû rayùq yùq lé lhoq lhut byi byi kut é ahkyíng nghut nyi ri.

Byù jùm gi, Pilat , Yesuq lé sat râ dông a dòqdan râ dùt ló jáng, “Yhang lé sat luî, Barabaq lé lhoq lhut byi aq.” ga, puk garû bum akô. Barabaq nghû sù yùq gi, Yerusalem wà mó má asuyaq lé gumlaû é hpúng eq xoq é sù nghut é htoq agó, byù myo myo lé sat bê sù le nghut é yánmai, htóng hkaû má lhùng to huî é sù nghut ri. Pilat gi, byù mòq mó lé radàm dum myî kat é má, Yesuq lé lhoq lhut byî kat nau é hkyô, yhángmòq lé tâi kyô nyi ri.

Nghut kôlhang byù mòq mó dum wùt garû kat kô é gi, “Yhang lé tapzîng má bàt tap keq! Bàt tap pyám keq!” gâ akô. Pilat sum da nghû râ dàm, byù mòq mó lé dum myî wú é gi, “Shí yùq gi, haî wá kut bê lhú?” ga, yhángmòq lé myî kat ri. “Ngò gi, yhang haî kut mù shí râ dùt é hkyô lé a myàng, ngò gi, yhang lé wâse èq za nhuq é hui nhâng luî, nhang kat pyám berâ nghut lhê.” gâ ri.

Nghut kôlhang, haû byù mòq mó gi, Yesuq lé tapzîng má bàt tap sat pyám râ dông za shèq je yhang puk garû lo nyi bùm bekô nghut ri. Lóhtáng má, Pilat gi, yhángmòq dúng garû é yánmai, Yesuq lé gi, shî râ dông dòqdan luî, Barabaq lé lhoq lhut byi râ dông myit hui byi bê nghut ri. Hau htâng, yhang gi, Yesuq lé yhángmòq ô nau é dông wó kut râ matú, byù mòq mó lé àp byî kat bê nghut ri.

Yesuq Lé, Tapzîng Má Jén Sat É Hkyô



Romaq gyèzô pé gi, Yesuq lé, tapzîng htoq má jén sat râ matú, wà mó mai shuî htoq ló bekô nghut ri. Hkyô lat má, yhángmòq gi, Kuruni ming mâ é Simun ga sù eq huî akô nghut ri. Yhang gi, yòsô wà mai wà mó shut, jé wang lo é sù nghut ri. Yhángmòq gi, yhang lé haû tapzîng wàq nhâng luî, Yesuq é htâng má cháng nhang akô nghut ri. Byù mòq mó gi, Yesuq é htâng châng sô tô bum é bang ra-am gi, myiwe wuì nghut mù, yhang lé zingri kô é yánmai ngau nyi bum akô.

Yesuq gi, yhángmòq lé lhing wú kat luî, “Yerusalem myiwe wuì ê! Ngá é matú hkâ ngaû kó, núngmòq gùng eq núngmòq zo dù wuì matú shèq ngau lo keq hkoi. Haî mù gâ le, byu pé mai, Gùng lòq a laî wú é bang, zo dù a dâp wú é bang eq, nú-nyheq wuì lé naú a huq wú é myiwe wuì gi, hkâ-í wó ngón kô râ lhú? ga, taí kô râ ahkyíng jé berâ.

Haú ahkyíng má, byu pé gi, bùm pé lé, “Ngá-mòq é ahtoq má, gyó nghop kô làq ô!” ga kôle, kong pé le, “Ngá-mòq lé nghop to kô làq ô!” ga, taí bùm kôra nghut lhê. Haí mù gâ lé, byu pé mai haí kut shut wú sù rayùq lé lhang, shí su kut kô é nghut le gi, gè gè kut shut bê bang lé gi, htàngnùng má hau htoq je hpu zo nhâng kôra za nghut lhê.” gâ ri. Haú byù mòq mó gi, mara bò su nhik í yùq lé le, Yesuq eq rahá shí nhâng râ matú, shui she jé lé lo akô. Yhángmòq gi, “U-gyap kong” gâ é jowò jé jáng, gyèzô pé mai Yesuq lé tapzîng má jén tap to bekô nghut ri. Yhángmòq gi, mara bò su nhik lé le, tapzîng má jén tap kôluí, Yesuq é lòq pai má ralhum, lòq yò má ralhum kut tsuq to bekô nghut ri.

Yesuq gi, “Áwa ê! Yhángmòq lé mara hkyut byi aq, haí mù gâ le, yhángmòq gi, yhángmòq haí kut nyi é hkyô lé, a dât gyo kó luí nghut lhê.” yhang lé tapzîng má jén tap bang é matú, kyû dung byí ri. Gyèzô pé ra-am gi, Yesuq é mèbu pé lé, ó yùq wó yu âng lhê nghu é lé kam chyam lhâm akô. Gótû shiwa byù myo myo gi, yàp mù lhing wú nyi kô é hkûn, Yudaq htûng sùwún wuì gi, Yesuq lé wuìzui kut mù, “Yhang gi, gó bang lé hkyi yù sù nghut lhê. Haú mù, yhang gi, Garai hkyin yu tô é hkyi yù sù nghut é têng le gi, yhang gùng lé yhang hkyi yu wú sháng gàq mhaí.” ga, taí byí akô.



Gyèzô pé le, yhang lé wuizui kut pyám byî akô. Yesuq é ulhum htoq má, “Shí yùq gi, Yudaq byù pé é hkóhkâm nghut lhê.” ga, kúmlhá kê tap tô akô. Mara bò su nhik mâ é rayùq sù Yesuq lé, rhoui é dông taî é gi, “Nàng, Garai hkyin yu tô é hkyi yù sù a nghut l hú? ga myi mù, Haû nghut le gi, náng gûng lé le, ngá-nhik lé le, hkyi yu wú laq mhaî.” gâ ri. Nghut kôlhang, mara bò sù gó yùq gi, hí taî kat sù lé, “Garai lé za gi, hkúngga aq! Ngá-nhúng sum yùq gi, shî râ dông dòqdân é hui bang chyat nghut lhê. Nàng eq ngò gi, ngá-nhik kut é marâ yánmai, shí dông shi ló râ gíng é su nhik nghut lhê.

Nghut kôlhang, shí yùq gi, a gè a shop é kut shut sù a nghut ô!” gâ ri. Hau htâng, yhang gi, Yesuq lé, “Yesuq ê! Nàng hkóhkâm dông ming ùp hi é hkûn, jeju mai ngò lé bûn ngham laq lhyô!” ga taî kat ri. Yesuq gi, “Nàng gi, hkû-nyí yhang, ngò eq rahá Hparadísuq má ló nyî berâ nghut lhê.” ga tû taî kat ri.

Yesuq Lé Myhup Pyâm É Hkyô



Yudaq mau Aramahti wà mai jé lé é Yosep gâ é byù rayùq nyi ri. Yhang gi, Yudaq htông tarâ lé cháng sù byù gè rayùq le nghut ri. Yhang gi, Yudaq htông kongsi má bolòm sù rayùq nghut to kôlhang, Yesuq lé dòqdân pyâm é hkyô má, i-myít a bo hui sù nghut ri. Yhang gi, Garai mai hkóhkâm dông ming ùp râ buì-nyí lé le myít myòq byu nyi sù le nghut ri. Yhang gi, Pilat chyáng Yesuq é gùng sôm lé dúng yu ri. Haú mù, gùngsôm haú lé tapzîng mai hkyut hkyô yù luí, pán yúng èq htup yup mù, ó lé lháng a kat wú shî é, luqgok lé kyûng tô é luqgok lup hkaú má kat tô ri. Haú nyí gi, Hên Lajang Buì-nyí nghut luí, Bánno buì-nyí jé râ za nghut bê.

Galile mau mai Yesuq eq rahá htoq lé lo é myiwe zo wuî le, Yosep htông má châng ê luí, lup haú lé le, Yesuq é gùngsôm lé le, hkâsu kut tô tô é lé, ê myang akô. Hau htông, yhangmoq gi, yhûm shut taú lò mù, Yesuq é gùngsôm lé bít byi râ matú, namngón é jung eq mura xû lé hen tô akô. Bánno buì-nyí má kúm gi, tarâ joq é eq rajung za, yhangmoq yuban bân nyi bum akô nghut ri.

Yesuq Dum Dui Toq Bê



Galilé mau mai Yesuq htâng châng é myiwe wuì gi, bánno htangnàp gyai noq le, haû lùp shut ê bekô nghut ri. Yhángmòq gi, Yesuq é gùngdu má büt byi râ matú yhángmòq hen lajâng tô é büt jung lé wàq chung bum akô. Yhángmòq lùp má jé ê kô é hkûn, myhî tô é lùqgòk long mó gi, lêng bóng to lánng é lé ê myang kat bekô nghut ri. Haû mù luî, ahkaû shut wang e wú le, yhûngsîng Yesuq é gùngsôm gi, a jòq to lánng lo mù, yhángmòq maú yàp nyi bum ashî hkûn, dùqbó é mèbu pé wùt tô é byù í yùq gi, radá dâm htoq shit luî, yhángmòq é nàm má lé yàp to bekô nghut ri. Haû myiwe wuì gi, gyai gyùq dan byùq kômù, myigùng shut lêng lèq bùm bekô nghut ri. Hau htâng, byù haú nhik gi, yhángmòq lé, “Núngmòq gi, asàk dui nyi sù lé, haî mù, lùp hkyûng má lé ho akô lhú? Yhang gi, Garaî èq dum duì nhâng bê nghut é yánmai shí jowò má a nyi to lo nghut ri.

Yhang lé yubàk wó bâng é lòq má àp pyám byi luí, tapzîng má jén sat pyâm é hui râ nghut lhê. Nghut kôlhang, sum nyí bui-nyí má dum dui toq râ nghut lhê gâ é hkyô lé, yhang, Galilé mau má nyi tô ashî hkûn mai, núngmòq lé taí kyo lù gù nghut bê lé, núngmòq haí mù abun a ngàm kô é lhú?” gâ akô. Hau htâng myiwe haú bang gi, Yesuq haí taí kyô wú bê lé, bûn kat bekô nghut ri. Haú mù, yhángmòq gi, lùp mai taú ló mù, Yesuq é chángzô pé raxe rayùq eq, gó bang lhúnglhang lé, yhángmòq wó myang yu é eq, wó gyô yu é bànshoq lé ló taí kyô kat bekô nghut ri. Myiwe haú bang gi, Mariq, Magadalaq, Yohanaq, Yakuq é yhângnu Mariq eq gó bang ra-am nghut bum akô. Nghut kôlhang, Yesuq é chángzô pé kúm gi, haú myiwe wuì taí é lé, dang sôm su ngam pyám kômû, a jíng byi kó nghut ri.

Haú hkûn chángzô pé mâ é Petruq gi, toq luí lup má din jé ê mù ngóm wú kat le, mâng htup é pán leq tô é lé za myàng mù luí, haú su dut é hkyô lé maú é èq, yhûm shut dum taú ló byuq bê nghut ri. Haú ra-nyí má za, Yesuq gi, yhâng é chángzo í yùq chyáng lé htoq shit ri. Haú nhik gi, gó bang lé haú hkyô taí kyo mù, chôm taí lhûm nyi le, Yesuq gi, yhángmòq é gung gûng má lé htoq shit luí, “Nungmoq nguingón yuqyo nyì sháng gaq.” ga luí, yhangmoq lé taí ri. Nghut kôlhang yhángmòq gi, sóbyô rayùq lé, myang nyi é su ngam pyám kô é yánmai, lhúnglhang bang gyai yhang gyùq byùq bùm bekô nghut ri. Haú mù luí, Yesuq gi, “Núngmòq gi, haí mù dan nyi bum akô lhú? Haí mù nungmoq é i-myit unghkaú má úng-âng nyi bum akô lhú? Ngá é lòq eq Ngá é hkyô lé wú wú keq.

Ngò yhang nghut nyi lhê. Ngo lé sop wú keq. Sobyô nghû é gi, ngo lé núngmòq myang é su, sho eq showui showang bo é a nghut.” ga luî, yhangmoq lé taî kyô ri. Yhang gi, haû su ga taí mù, Yhâng é hkyî loq lé tân shit ri. Yhangmoq gi, gabú é eq maú nyi bùm kômù, a wó jing shi dut tô é hkûn lé, Yesuq gi, “Nungmoq shí má zô jung rajung jung wó akô lhú?” ga myî kat ri. Yhángmòq gi, chyoq to lùgù nghut é ngozo ra hkyí, yhang lé byî kat kô jáng, yhang gi, yù luî yhángmòq é hí má zo shit bê nghut ri.

Hau htâng, yhang gi, yhángmòq lé, “Shî gi, dùt lò be râ nghû, ngò núngmòq lé taî wú bê dang yhang, hkyak za dùt lò bê nghut lhê. Ngò eq séng luî, haû chyoiyúng chyúmdang pé má, kê tô é lhúnglháng gi, teng za jé lô râ za nghut é hkyô, ngò taî kyô wú bê nghut lhê.” gâ ri. Yhang gi, xoq mù, chyúmdang pé lé, sê gyô yù kô sháng gàq ga luî, hkyô hkangmó lé taî sân kyo byi bê nghut ri.

Haû mù, Yhang gi, “Hkrisduq gi, wuîhke jamjau hui zo mù, sum nyí nghû râ buinyì má, shi é mai dum dui toq lô râ hkyô lé le, Yerusalem wà mó mai hî luî, byù myû chângjup lé, Yhâng é myìng lé lang luî yubak mara hkyut pyám byi râ hkyô eq myit lhîng râ hkyô lé le, hko kyo râ hkyô lé, kê to bê nghut ri. Nungmoq gi, shí pê é saksé pé nghut nyi akô. Ngá Wa byî tô é danggidiq lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyì jé shoq, Yerusalem wà mó má láng nyî keq.” ga luî, yhangmoq lé taî ri.



Núngmòq gi, byu pé lé núngmòq sê tô é hkyô shí pé lé taí kyo ra kôra nghut lhê. Ngò gi, ngá wa Garai chyáng mai, núngmòq lé, byi râ ga luí, dang gidìq tô tô é, haú Chyoiyúng Woi-nyí lé, núngmòq chyáng nhang kat byi râ nghut lhê. Nghut kólhang, núngmòq gi, núngmòq chyáng haú Chyoiyúng Woi-nyí jé lé mù, byu pé lé shí pê é hkyô, taí kyo râ matú, Garaí chyáng mai atsam wum-o byí é bui-nyí jé shoq, shí Yerusalem wà mó má za lánq nyí ra kó râ nghut lhê.” gâ ri.

Hau htâng, Yhang gi, yhangmoq lé Behtani wà yàm shut shuí htoq ê mù, Yhâng é loq tu toq luí, shimân byí ri. Haú su kut shimân byí nyi ashí le, Yhang gi, yhangmoq chyáng mai gâng ló byuq luí, mauhkûng shut shuí toq yu é hui bê nghut ri. Yhangmoq kúm gi, Yhang lé noqkuq kômù luí, gyai gabú é myit èq Yerusalem wà mó shut dum taú ló akô. Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

